

# GALESIA

## Pol Rii Galesia Ma Yenya Har Jey Maji

<sup>1</sup> Ada Pol. Ma por rii ada aposel tawey hisiiichi heechikasakech. Maka heechikasakech. Jisas Kraist riita harek, riina kawka yeechi yesokwar Apoko God rii Jisas Kraist piiriita ana hisiiichi heechir. <sup>2</sup> Ada adaka tawa yaka kumwoy yechaka nota Galesia ya yopo wuchi yichawa Kristen ma kwona woshiato.

<sup>3</sup> Noti Apoko God, noti Harapa Jisas Kraist piiriita sa kwona rukusii tawa boboyen inyaka otii kepi sii tawa boboyen sa ha. <sup>4</sup> Kraist riita noti Apoko God riiti inyakan eena sumowu tari, rii mayama harek, rii noti kapasek boboyen eena bachi poyerek, rii notaka diita nosapek kapasek tawa boboyeka eecha tarek, rii eena nona yeechiniga heemachir. <sup>5</sup> Eena na God riiti hin eechaba yesokwa ta.

### *HADABAS MAJI PODAT*

<sup>6</sup> Eeji inyaka kwota otii tawa boboyen eena heneba raboto! Ma por rii Jisas Kraist riiti rukusii tawa boboyek kwona uwa tarek, kwo ameya riina heechi kwo i anadii majin eena i sumowu tar. <sup>7</sup> Eeta siiken anadii hadabas maji takasakech. Yahoo. Wowak, ma kaw ye yaniga ye Kraist riiti hadabas majin di dareboyechi kwoti inyakan kapasek otiito. Eena ada kwona wocho.

<sup>8</sup> Nota hadabas majin sawo tawey, eetaban sa

sawo ta. Nota, hevenek tawa ejel por rii, akar majin kwona sawo taney, rii sapa hi uwu tawa eemek i! <sup>9</sup> Nota mashi wor. Apa ada kawka wocho. Ma por rii God riiti maji kepiga eecha sawo taney, ii mashi kwota meeji tar maji tanan siiney, ii sapa hi uwu tawa eemek i.

<sup>10</sup> Ada bawa maji kwo meeji tawey, kwo kapo eecha hikitu ada yo gegiyato ma ye eeji hiban yesokwakiita? Yaho. Ada gegiyato ana eeji hin God riita yesokwakiita. Kwo boy eecha hikitu ana ma yecha hiki siitiichiken an eena gegiyato? Ada eecha hiki taney, ada God riiti wakasa makasakech.

### *POL RIITA APOSEL SIIR MAJI*

<sup>11</sup> Yaka kumwoy, ada kwona wocho: ada sawo tawa hadabas majin ma ye otiikasakech. <sup>12</sup> Ma ye ana hakasakech. Ii ma ye ana saka pokiiterek. Yaho. Jisas Kraist riitaba saniga ana mukuchichar.

<sup>13</sup> Kwo meeji tar ada mashi Ju ma yechi lotu majin eena sumowuniga otii tarek, ada God riiti Kristen ma yenya kikire poyiniga pi hamaken otii tar. <sup>14</sup> Ada Ju ma yechi lotu majin sumowu tari, ada eeji hadii yenya dagiir poyer. Ada eeji wayega yechi otii tar abon eena hehar sumowu tar.

<sup>15</sup> Worek, ana saka yimowu tarek, God riita ana eeka yeyada rukusiichi hisiid. Riiti yon ada otiiken eena hisiid. <sup>16</sup> Ada hadabas majin shebo shebo tawa ma yenya sawo taken, eena God riiti nedii God riita hikichi rii riiti Yikapwan ana mukuchir. Eeta nedii ada akar man wohekasakech. <sup>17</sup> Ada Jerusalem akamak mashi

otiiir aposel yenya heken saka irek. Yahoo. Ada ameya Arebia nosapek iri, Damaskas akamak awasen iyarer.

<sup>18</sup> Sukwiya piiriichar hamarek, ada Jerusalem akamak Pita riina heken ir. Irek, ada riitaka wik upurus eeka siir. <sup>19</sup> Ada Jems Harapa riiti kumwoyen, eechaba her. Anadii apsoel yenya saka herek. <sup>20</sup> Ada keyi tawa maji eeta maji siiken. Ada wiishipiikasakech. God riita hecho!

<sup>21</sup> Kommas ada Siria nosapek Silisia nosapek iri, eeta akamak kawek eeka siir. <sup>22</sup> Eeta nedii eeta Kristen ma Judia nosapek tari, yecha eeji misoman saka hecharek. <sup>23</sup> Ye majiban meeji tar maji diitata: “Mshi diita ma rii nona piken kikir poyer ma. Rii diita majin nediiik reekiiken eena otiiir. Apa rii diita God riiti majin hehar sawoto!” <sup>24</sup> Yecha meeji tarek, eena yecha God riiti hin yesokwar. Eeji hin saka yesokwa tarek.

## 2

### *POL RII ANADII APOSEL YECHAKA EECHA YAKA KUMWOY SIIR*

<sup>1</sup> Kommas 14 sukwiya hamarek, ada Jerusalem akamak Banabas riitaka eecha ir. Taitas rii eechaba adaka ibar. <sup>2</sup> God riita ana mukuchirek, eena ada ir. Irek, yechi akak ya yopo wuchi yirek, ada yenya ada shebo shebo tawa man sawo tar maji kepin genyik ada harapa man kwodii wor. Ada eecha hiki tar ada mashi otii tar yon apa otii tawa yon iipa ada sobo yo otiikiita. Eena ada kwodi wor. <sup>3</sup> Taitas rii adaka eecha ichari, Grik maka eecha tari, riiti maba sapin ye saka dagiirek. Worek, ma kaw ye riiti maba sapin

dagiibaken gegiya tar. <sup>4</sup> Ye ya veenyechi yaka kumwoy woshepiichi notaka eecha ya nareboy siirek, maba sapin dagiibaken hiki tar. Nota Jisas Kraist riitaka yichawey, nona heemachichawey, ye eena nona heken yar. Yarek, ye nona eechaba mashi Ju ma otii tar nobok poko jibaken hikitu. <sup>5</sup> Nota yenya meejichi anabeyichi yenya sumowukasakech. God riiti maji siiken kwotaka eecha taken eena no eecha yenya sumokasakech.

<sup>6</sup> Ma kaw ye harapa ma wochari, ye akar maji ana pokiikasakech. Ma kaw yechi hi harapa taney, ii ada eecha hikitu eeta kubuchey boboy. God riita ma yechi hin hekasakech. Yaho. Rii ma yechi inyaken wopun eena hecho. <sup>7</sup> Harapa ma ye diina her: God riita Pita riitana yon harega, rii Ju ma yen hadabas majin sawo tawak, God riita ana harebaga ada shebo shebo tawa man eechaba sawo taken eena har. <sup>8</sup> Ayo, God riita otiichirek, Pita riita Ju ma yechi aposel tawak, God riita eechaba riiti hapaga tawa boboyek an otiichirek, ada shebo shebo tawa ma yechi aposel tawa. <sup>9</sup> Jems, Pita, Jon yecha harapa ma herega, ye her God riita ana rukusiirek, rii ana diita yo podateban harek, ye ana Banabas riitaka tapa neekir. No yo meshi otii tawa ma tawak, nota eyey podateba hikir sicha i shebo shebo tawa ma yechaka eecha otiitanak, yecha Ju ma yechaka eechaba otii takiita. <sup>10</sup> Yecha way woher, “Kiiriisiiposii tawa ma ye notaka eecha tawey, opoche yenya abosuchitanakech.” Diita boboyen ada eena harapa yo otii tar.

*POL RIIT5A PITA RIINA MAJI BAR*

<sup>11</sup> Pita riita Adiok akamak ya sayarek, riita kapasek otiirek, ada riina geenyik riiti misomak nasowoyer. <sup>12</sup> Jems riita ma kaw yen heechirek, iri ye saka yarek, Pita riita shebo shebo tawa ma yaka kumwoy yechaka eecha atar. Jems riita heechirek ir ma ye yarek, Pita rii akiichi rii kawka yechaka saka eecha atarek. Rii shebo shebo tawa ma yechi maba sapin diigiik oti tawa Kristen ma yenya akiichi eena kawka yechaka akasakech. <sup>13</sup> Worek, anadii Ju ma yaka kumwoy ye eechaba akii tarek, Pita riitaka akii tar. Worek, Banabas rii eena hechi akiichi rii otiibar. <sup>14</sup> Yecha hadabas maji siiti nobok saka nagwa nagwa ichawak, eena ada hechi eyey ma yechi misomak ada Pita riina diita maji bar: “Miita Ju ma tawey, mii eeta shebo shebo tawa ma yecha ma oti tawabaga, mii eechaba otiito. Ju maga eecha otiikasakech. Wowak, mii boyewak shebo shebo tawa ma yen otiiniga ye Ju ma siiken eena wocho?”

***JU MA YEN SHEBO SHEBO TAWA MA YEN KRAIST RIINA HIKI SIITIICHICAWA NOBOK EEKA YESOKWA YICHITU***

<sup>15</sup> Eeta siiken non yimowurek, no eeta Ju ma siir. No shebo shebo kapasek oti tawa ma takasakech. <sup>16</sup> Wowak, nota eecha hikitu: ma ye loban sumowu tawey, ye God riiti misomak nagwa nagwa ta makasakech. Ye Jisas Kraist riina hiki siitiichichawey, ye eeta God riiti misomak eeka nagwa nagwa tawa. Kraist riina hiki siitiichichawa nobok no God riiti misomak nagwa nagwa taken eena nota Jisas riina hiki siitiichichar. No loban eena sumowukasakech. Ma por rii loban sumowu tawey, rii God riiti

misomak nagwa nagwa takasakech. <sup>17</sup> No Kraist riiti nobok no God riiti misomak no eeka nagwa nagwa siik otii tawey, nota mayama kapasek tawa ma henyey, shebo shebo tawa ma ye kapasek tarega no eecha henyey, ii boy kapo kwo eecha wocho Kraist rii kapasek nobon otii tawa ma? Yahoo. Eecha wokasakech. <sup>18</sup> Ada lon pochin reekiiri, eeta lo majin ada kawka eena yesokwaken otiiney, ii eecha mukuchichu ada kapasek otiito ii lon reekiito. <sup>19</sup> Lok nota hikitawey, ana eeka pi sowakwo har. Lo eeta ana sowakwor. God riitaka eecha siiken eena pi sowakwor. Eeji mashi otii tar abo siin mek ji siitiichirek, Kraist riitaka eecha mek har. <sup>20</sup> Harek, eeta otii tar abo eechaba takasakech. Worek, Kraist riita eeji sugu wopuk eeka tawa. Tawey, adaka eecha tawey, ada God riiti Yikapwa riina hiki siitiichichawa nobok eeka yichu. Rii ana rukusiichi hachir. <sup>21</sup> Ada God riita yeyada rukusii tawa boboyen eena nasowoyekasakech. Lo eeta man otii kepi siiney, God riiti misomak i nagwa nagwa siiney, Kraist rii biish shebo shebo har!

### 3

#### *LON SUMOWU TAWA NOBO SII JISAS RIINA HIKI SIITIICHICHAWA NOBOKASAKECH*

<sup>1</sup> Galesia ma kwo eeta hikishato. Nama kwoti inyakan otiichicharek, kwo eena kapasek hikitu? Kwoti misomak ada kwona mukuchir Jisas Kraist rii mek ji siitiichirek, har! <sup>2</sup> Ada kwonaboboy podaten wohek otiito: boyikadey nobok kwo God riiti Spiriten yar? Lon sumowu tawa nobok kapo

eeka yar? Hadabas majin meejichi hiki siiti-ichichawa nobok eeka kapo yar? <sup>3</sup> Kwo eeta kapo hikishawoyetu? Kwo God riiti Spiriten tasiichi hikirek, boyewak kwo kwoti otii tawa tobon otii hamaken eena otiito? <sup>4</sup> Kwota mashi ichar nobo kwo boy kapo i hipiir? An eecha hikitu kwo biish neekikasakech. <sup>5</sup> God riita eeta Spiriten kwona ha tawak, harapa mirakel kwotaka otii tawak, kwo boyen kapo hikitu kwo lon sumowu tawak, rii eena otiito? Kwo hadabas maji meejichi hiki siitiichichawak, rii kapo eena otiito? Kwo eeta riina hiki siitiichichawak, eena otiito.

<sup>6</sup> Ii diitata: God riita mashi keyir maji eecha wor: “Epraham rii God riina hiki siitiichichar. Hiki siitiichicharek, God riita riina kepi her.”

<sup>7</sup> Worek, kwota na hiki: God riina hiki siiti-ichichawa ma ye eeta Epraham riiti yikapwa siiken. <sup>8</sup> Mashi maji keyir ma mashi ye eecha her God riita komas hiki siitiichichawa nobok shebo shebo tawa man otii kepi siikiita. God riita Epraham riina bar majin mashi keyir maji sii tar. Sii eecha wor: “Miiitaka God riita diita nosap ma mima yenya rukusii otii kepi siitakiita.”

<sup>9</sup> Epraham rii God riita hiki siitiichirek, riina otii kepi siichir. Worek, eyey ma ye eena hiki siiti-ichichawey, yenya eechaba diita otii kepi siibato.

<sup>10</sup> Kata ma ye loban eena sumowu tawey, yecha hi uwu tawa nobok eeka ichu. Mashi keyir maji eecha wocho: “Kata ma rii bukuk tawa eyey lo majin sumowunan siiney, rii eeta hi hayi tawa nobok eeka ichu.” <sup>11</sup> Wowak, dii eeta geenyik sowa: loban sumowu tawa ma ye God riiti miso-mak i nagwa nagwa sokwakasakech. Mashi keyir

maji eecha wocho: “Kata ma rii God riina hiki siitiichichawey, riina God riiti misomak oti kepi sowey, riipa eechara eechara takiita. <sup>12</sup> Lo sii eeta hiki siitiichichawa boboyekasakech. Yaho. Mashi keyir maji eecha wocho: “Kata ma rii loban smowu taken hiki tawey, rii sa eyey lo noboban sumowu ta.”

<sup>13</sup> Eeta lo sii nona otiiniga no eeta kapasek woy tar. Tarek, Kraist rii nona kapasek woy siichirek, rii nona heemachir. Mashi keyir maji eecha wocho: “Ma por riina mek ji siitiichiri, rii eeta kapasek woy siir.” <sup>14</sup> God riiti inyaka eeta geenyik tawa: Kata hadabas boboyen God riita Epraham riina wocharin, eena shebo shebo tawa ma ye Jisas Kraist riiti nobok eeka otiiniga sapa eeka ya ta. Eena nota hiki siitiichichawey, no God riiti wochar Spiriten eena yato.

### *LO MAJI, GOD MASHI WOR MAJI*

<sup>15</sup> Yaka kumwoy, ada noti oti tawa abo banak, ada boboy pochin kwona mukuchik. Ma upurus piiriita podatebak hikichi apo dagiichi piiriiti hin jeyek keyiney, ma por rii opoche nediik eena reekiitanakech. Opoche akar majin jeyek kawka heechitanakech. <sup>16</sup> God riita riiti wotar majin barek, Epraham riina barek, rii Epraham riiti neja poren eena wotabar. Ri wotar maji eeta “riiti neja yenya” saka worek. “Nokwapa nokwapa ma miman” saka worek. Eecha wor: “Miiti neja podar.” Maji mu eeta Kraist riita. <sup>17</sup> Eeji maji mu diitata: God riita maji heechirek, riita hkichi komas otiiken eena wor. 430 sukwiya siirek, lo sii eeka komas ya sokwar. Lo siita sokwari, God riiti



wotar majin apo dagii tari eena reekiikasakech. Sobo otiikasakech. Yahoo. <sup>18</sup> God riita man lo nobok oti yesokwaney, rii mashi wotar majik oti yesokwakasakech. Wowak, God riita Epraham riina wotar boboyek riina eeka yesokwa yichir.

<sup>19</sup> Boyewak God rii lon har? Diitat: Nota kapasek oti tawa boboy siiti mun mukuchiken eena har. God riita hikir Epraham riiti neja por riita yanak, lo eeta hamakiita. God riita riina maji wotar. Diita lon ejel kaw ye yayarek, nediik tar ma por riiti tapak eeka yar. <sup>20</sup> Wowak, God riita saniga oti tawak, wotar majin oti tarek, nediik tawa ma rii dopokasakech.

*LO EETA SII EETA NONA MUKUCHICHAWAK  
NO KRAIST RIITAK ICHU*

<sup>21</sup> Diita maji kapo shecha wocho: Lo sii boy eeta God riita mashi wotar majin siina ow otiito? Yahoo. Ow otiikasakech. Man oti kepi sii tawa lo pochi siita taney, siipa ma oti kepi sii tawa lo siitabaga God riiti misomak eeka kepi siikiita.

<sup>22</sup> Wowak, mashi keyir maji eeche wor, “Kapasek oti tawa boboy eeta man pokoga jichu. Jichawak, kata ma ye Jisas Kraist riina hiki siitiichichawey, yecha God riita wotar boboyen yak.

<sup>23</sup> Mashi hiki siitiichichawa nobo saka ya tarek, eeta nedii eetallo nona poko jichar. Poko jichari, hiki siitiichichawa nobo sii komas yar. <sup>24</sup> Kraist riita saka yatarek, eeta lo mashi nona siitii kowu tar. Eeta lo sii nona maji pokiichi yeechiniga Kraist riitak ye ichu. Kraist riita yarek, nota riina hiki siitiichichawak, no God riiti misomak eeka nagwa nagwa siiken tawa. <sup>25</sup> Eeta hiki

siitiichichawa boboy yarek, nota siitii kowu tawa lo sii nona kawka siitii kowukasakech.

***HIKI SIITITAWA INYAKA SII EETA OTIINIGA  
NO GOD RIITI YIKAPAWA***

<sup>26</sup> Nota Jisas riina hiki siitiichichawey, no Kraist riitaka eecha tawey, no eeta God riiti yikapwa siiken tawa. <sup>27</sup> Kwon uku yeechiri, kwo eeta Kraist riitaka siir. Siirek, kwo Kraist riiti boboyen ruwuchi riita tawabaga kwo eechaba tawa. <sup>28</sup> Tawak, kwo Ju makasakech, shebo shebo makasakech. Kwo poko jichawa makasakech, heemachi biish tawa makasakech. Kwo Kraist riitaka eecha tawey, kwo eeta podarebak tawa. <sup>29</sup> Kwo Kraist riiti taney, kwo eeta Ebrahim riiti neja siiken tawa. Eecha tawak, kwo God riita wo tarin, kwopa yakiita.

## 4

***JISAS RIITIK NO WAKASA YO OTII MA SIICHI  
NO RIITI YIKAPWA SIITO***

<sup>1</sup> Ada maji kawka bako. Yikapwa por tawey, rii riiti apoko riiti nosapen komas yaney, eyey boboy eeta riiti siiney, rii hadiiyey tari, rii eeta yo otii wakasa maga jecha tar. <sup>2</sup> Rii hadiiyey tari, anada ma ye riina kiyatay tar. Riiti boboy heharechichar. Ii eeta nedii apoko riita mukuchir nedii siir. <sup>3</sup> Nota eechaba tawa. Mashi nota yikapwaga eecha tarek, mashi otii tar abo siita nona siitii kowu tar. <sup>4-5</sup> God riita hiki nedii hamarek, riita riiti Yikapwan heechirek yar. Riita yari, mima pochi siita riina yimowur. Yimowurek, rii Ju ma yechi lo kuruk eeka tar. Nota Ju ma yechi lo kuruk taweyn, eena heemachiken

yar. Nota sakwa God riiti yikapwa siiken eena yar.

<sup>6</sup> God riita riiti Yikapwa riiti Spirit noti sugu wopuk heechirek yar. Yarek, eeta nona mukuchichu no eeta God riiti yikapwa. Diita Spirit noti sugu wopuk tawey, eecha wocho: “Apoko, eeji Apoko!” <sup>7</sup> Worek, mii wakasama siikasakech. Mii yikapwa sowa. Mii yikapwa sowey, God riipa riiti yikapwan har boboyen miina eechaba hakiita.

### *POL RII GALESIA MA YENYA INYAKAPWA HIKIR*

<sup>8</sup> Mashi kwo God riina hekasakech. Worek, boboy God riitaga takasakech eeta kwona siitii kowu tarek, kwo poko jiniga tar. <sup>9</sup> Wowak, apa kwo God riina hewa. Nago apa ada kwona wocho: “God riita kwona hewa.” Rii kwona hewak, boyewak kwo kiiriisiiposii tawa mashi oti tar abo eeka dareboyeken gegiyato? Boyewak kwo diita nosapen siitii kowu tawa spiriten dareboyeken gegiyato? Boyewak kwo kawka yechi wakasama siichi sokwaken gegiyato? <sup>10</sup> Kwota mashi oti tari, kwo God riiti inyakan sumowuken gegiyatari, eena diita eecha otiito: Kwo yadii kawen, niiwiika kawen, nedii kawen, sukwiya kawen kwo eena harapa hikichi saniga saniga seechitu. Seechi tawey, ii eeta kapasek. <sup>11</sup> An kwona hiki tawey, an akiito! Eeji yo kwotaka eecha tawey, ii boy kapo an shebo shebo otiir.

<sup>12</sup> Yaka kumwoy, ada kwota hechi hiki tawey, kwo na sokwa adabaga eecha sii ta. An sokwa kwotabaga eecha siir. Kwota ana kapasek otikasakech. <sup>13</sup> Kwo hikitu mashi ada kwona mapo

hadabas majin harek, an hak otiir. <sup>14</sup> Ada hak otiirek, eeeji maba kapasek tarek, kwo ana hechi akiirek, kwo ana nasowoyekasakech. Worek, kwo ana God riiti ejel ya tawaga an eeche yar. Kwo Kraist Jisas riina ya tawaga ana eeche yar. <sup>15</sup> Eeta nedii kwo kwoya hiki tari, sii kapo siitak heechi ir? Ada way kwona wocho: Ada kwona wohenyey, “Kwo kwoti miy na hor yeechi ana ha,” kwo hor yeechi waga ana hawa. <sup>16</sup> Apa ada kwona maji siikenen ba tawey, kwo boy sokwa ow ana pichawa ma siir?

<sup>17</sup> Anadii ma yecha kwona yaken kwoya hechuwak, ye kwona kapasek nobok yeechi neeki ichu. Yecha nona inyi jichiniga saniga saniga ye i yayakiita. Kwo yechi hin yesokwaken ye eena gegiyato. <sup>18</sup> Nago, ma yecha kwona omutiik nobok ya yeechi ye iken otiiney, ii eeta kepi. Ada kwotaka eeche tawey, eeta kepi. Ada kwotaka takasakech, ii eeta kepi. <sup>19</sup> Eeeji yikapwa, nok-wapa sii yikapwan yimowu tawa nedii tawaga ada eecheba kapa meeji tawa boboyen kwona kiyabachichu. Kraist riiti inyakak tawa boboyen kwotaka sokwa eeche tanak, wonyak ada kapa meeji tawa boboyen heechikiita. <sup>20</sup> Ada kwotaka eeche taken an gegiyato. Kwotaka eeche taney, ada akar boboyen kwona hikichichu. An kwona harapa inyakapwa hikiitu.

### *Hega, Sera Piiriiti Shiy Tar Maji*

<sup>21</sup> Ma kwo lo majiban sumowu tawey, ada kwona majin wo heken otiito: kwo boy lo majin meejiito? <sup>22</sup> God riiti maji eeche wocho: Epraham rii yikapwa upurusen kiyar. Mayama mima

sii poren kiyarek, yo oti wakasa tar mima sii poren kiyar. <sup>23</sup> Yo oti wakasa tar mima sii kiyar yikapwa riin yimowuri diita nosapek tawa nobok eeka siir. Mayama mima sii yimowuri, rii eeta God riiti wotar maji nobok rii eeka sokwar. <sup>24-25</sup> Ada shiyi tawa maji mun bako. Mima piiriita mayi upurus apo dagii tawa majin bako: Hega sii siiti nosapek eeka tarin yarek, eena sii eeta Sainai kwowu mayi tawak, lo siiti mayi tabato. Moses rii Sainai kwowuk lon yari, eena sii eeta mayiga tawa. Sii eeta Jerusalem akama mayi tabato. Jerusalem akama ma mima ye eeta yo oti wakasa ma tawak, Hega siiti yikapwa ye yo oti wakasa maba tawak, eena sii eeta mayi. Sainai kwow si akar hi Hega. Siita tar eem Arebia. <sup>26</sup> Wowak, howuk tawa Jerusalem akama sii eeta noti awi tawak, no eena pokochi takasakech. No heemachi biish tawa. <sup>27</sup> Mashu keyir maji eecha wocho:

“Mima ni yikapwan ma kwo ma ari, ninya na inyaka

kwoya hiki ta!

Mima ni yikapwa kapa meejinan biish siiri,  
ninya na harapa uwa ta.

Ma biish tawa mima sii akar yikapwa nokwapa nokwapa  
tawey, sii maka tawa mima siitaka eecha  
kikisiikasakech.

Eena na inyaka kwoya hikichi  
uwa ta!”

<sup>28</sup> Yaka kumwoy, God riita riiti wotar majin oti-irek, kwo eeta God riiti yikapwa. Aisak riita eecha tarega, kwo eechaba tawa. <sup>29</sup> Eeta nedii kata

yikapwan diita nosapek tawa nobok yimowuri, rii God riiti Spiritek otii yimowur yikapwa riina kikir poyer. Eecha otiirega apa nota eechaba tawa. <sup>30</sup> Tawak, mashi keyir maji siin shecha wocho? Sii eecha wocho: “Poko jichawa mima siina yikapwaka eecha na kayek heechinak sa i. Yo otii wakasa tawa mima siiti yikapwa rii mayama mima siiti yikapwa riitaka apoko riiti boboyen piir eecha chegiik saka yakiitawak.” <sup>31</sup> Wowak, nota yo otii wakasa tawa mima siiti yikapwakasakech. Nota mayama mima siiti yikapwa tawa.

## 5

### *Poko Jichawa Boboy Na Heechi*

<sup>1</sup> Kraist riita nona heemachicharek, no eeka tawa. Nona heemachichawa ma tawey, eeka na siitii ta! Kwo opoche heechi tanak ye ya kwona kawka poko jichanakech. <sup>2</sup> Na meeji! Ada Pol. Ada kwona diita majin wocho. Kwota heechinak, kwoti maba sapin ye dagiiney, Kraist riiti yo saka kwon kaw kiyatayekiitawak. <sup>3</sup> Ada kwona genyik bak. Ada kawka wocho: ma por rii heechinak, yecha riiti maba sapin dagiiney, riita sapa eyey lo majiban sapa sumowu ta. <sup>4</sup> Ma ye kwotaka tawey, ye eecha hiki tawey ye lo majiban eena sumowu tawey, God riiti misomak yenya sokwa nagwa nagwa siiken eena hiki tawey, ye Kraist riina heechir. Ye God riiti rukusii tawa boboyeka eecha takasakech. Ye sabak eeka tawa. <sup>5</sup> Nota way eecha hikitu God riitaba riiti misomak nona sokwa nagwa nagwa otiikiita. God riiti Spirit riiti hapaga tawa nobok no Jisas riina eeka hiki

siitiichichawey, nota Jisas riina kowutu. <sup>6</sup> No Jesus Kraist riitaka chegiik eecha tawey, maba sapi dagii tawa boby sii eeta kubuchey boboy. Sapi dagiinan siiney, eeta kubuchey boboy. Ma ye hiki siitiichichawa nobok eeka rukusii tawey, ii eeta harapa boboy mayaka.

<sup>7</sup> Kwo mashi hehar otii tar. Kapo nama oti-ichirek, kwo omutiik nobon saka sumowutawak? Kapo boy majin kwon ba tarek, kwi inyaka dare-boyer? <sup>8</sup> God riita kwona uwa tari, rii kwona saka ottichirek. <sup>9</sup> “Geyen chichawa karakada yis sii geyen harapa piipiitakiita.” Karakada kapasek boboy sii sokwa ottichuwak, harapa kapasek boboyek siito. <sup>10</sup> Wowak, ada eecha hikitu God riita kwona kiyatayekiita. Nota God riitaka eecha tawey, ada hiki woyetu kwota anadii nobok saka ikiitawak. Ada eechaba hikitu kata ma rii kwona kapasek otii tawey, riiti hin ada saka hewak, God riita riina komas pichiniga hehareto.

<sup>11</sup> Yaka kumwoy, ada maba sapi dagii majin sawo tawey, boyewak Ju ma ye ana pi kikir poyetu? Ada Kraist riiti me majin sawo tawey, ada maba sapin dagii majin sawo taney, kikir poy tawa boboy adak yakasakech. <sup>12</sup> Ada eecha hikitu kata ma ye kwona kapasek maji ya gamu tawey, ye sa i yechi eyey boboyen sa kwotii ya!

<sup>13</sup> Yaka kumwoy, kwona God riita heemachinyak siiken eena kwona hisiiir. Kwon heemachi tawey, kwo opoche eecha hikitanakech, “Noti biik tawa yon nota eena otiitakiita.” Yahoo. Kwota na anadii ma yenya na rukusiichiniga yenya na kiyatay ta. <sup>14</sup> Eeta eyey lo eeta maji podatebak wocho: “Miita mayama

rukusii tawaga, bana bana tawa man na eechaba rukusiiba ta.”<sup>15</sup> Wowak, asa yecha otii tawabaga, kwota eechaba otiiney, kwo anadii man otii pishamaneney yenya kapasek otiiney, kwo ii na opoy sii tanak, na akii ta. Kwo awasen awasen eyey pi monekiita.

*Spirit Otii Tawa Abo, Mashi Hikichi Otii Tar Abo*

<sup>16</sup> Diita maji ada bato: kwo na Spirit riitaka eecha na i cha. Eecha na ichanak, kwo mashi hiki tar abon eena sumowukasakech. <sup>17</sup> Noti mashi hikichi otii tar abo sii Spirit riiti nobon dagiir poyeken eena gegiyato. Spirit rii way mashi nobo siina dagiir poyeken eena gegiyato. Piiriita eeta ow ana pichawa boboy. Diita eecha wocho nota otiiken gegiyaney, kwo eeta saka kiki siikiitawak. <sup>18</sup> Kwota Spiritenn riina sumowuney, lo sii kwona dagiir poyekasakech.

<sup>19</sup> Mashi hikichi otii tawa abo siita eeta geenyi woyek tawa. Diitata: nobo anemeshero ko mima otii tawa abo, keha hikitawa abo, waxisichichawa boboy otiitawey, <sup>20</sup> men teechi sikiyawas haba tawey, siiga kapan otii tawey. Diita boboy sii mashi hikichi otii tar abo diitata. Ma yecha ow ana pichu. Yecha yechi hiban yesokwataken eena gegiyato. Anadii ma yechi hin dagiir poyeken gegiyato. Ye inyaka kwotaye tawey, ye ma piikeechi saniga saniga tawey, <sup>21</sup> ye akar ma yechi boboyen kwoya hechawey, beyichishi tawey, akar harapa kapasek boboyen otiibato. Mashi ada ow poy siitarek, apa diita ada ow poy siibato. Kata ma ye diita boboyen otii tawey, ye God riiti kigdomek saka yakiitawak.



<sup>22</sup> Wowak, eeta Spirit rii diita boboyen ot-tichichawak, ma ye eena akar man rukusiito. Ottichichawak, ma ye inyaka kwoya hikitu. Ma ye akiikasakech. Ottichachawak, ma ye akar man kowuchichi hato. Otiichichawak, akar man rukusii tawak, akar man hehareto. Ye akar man kiyatayeto. Akar man maji omutiiken bachi otiito. <sup>23</sup> Ottichichawak, ma ye kapasek inyaka kwotayaney, ye eena dagiir poyechi kapasek otiikasakech. <sup>24</sup> Kata ma ye Jisas Kraist riiti tawey, ye yechi diita nosapek tawa maba yi hiki tawa boboyen, otii tawa boboyen, gegiya tawa boboyen sowakwo eeta har. <sup>25</sup> Eeta Spirit rii nona otiichichawak, no diita akar tawa. Tawak, Spirit rii nona sa veyi muga eecha ya. <sup>26</sup> No opoche yama yama tanakech. Opoche no akar man kwotay boboyen otiitanakech. Opoche no akar ma yechi boboyen kwoya hechanakech.

## 6

### *Anadii Ma Yecha Kiya Tawa Boboyen Ii Na Kiyaba Ta*

<sup>1</sup> Yaka kumwoy, ma por rii kapasek boboy pochin otiiney, ma ye henyey, ma Spiritek tawey, kwo riina na nagwa nagwa kiyatayechinyak, rii sa hehar i sii. Eshar eshar na otiichicha. Kwo na mayama ow poy sii ta. Iipa Gaba rii kwona otii otii hekiita. <sup>2</sup> Anadii ma yecha kiya tawa boboyen kwo eena na kiyatayechi kiyaba ta. Eecha otii taney, kwo Kraist riiti lon sumowu takiita. <sup>3</sup> Ma por rii kubuchey ma taney, rii riiti hin mayama harapa ma hiki taney, rii eeta mayama woshepii tawa ma. <sup>4</sup> Ma ye yecha otii tawa boboyen saniga

saniga na henyak, ye sa yechi yoban eena hehar keyibo ta. Yo kepi taney, ye sa yechi inyaka kwoya hiki ta. Opoche kwo akar ma yechi yoka eecha keyibotanakech. <sup>5</sup> Eeta kepi ma por rii sa keena riiti boboyen kiya ta.

<sup>6</sup> Worek, kata ma rii God riita majin meeji tawey, rii sa riiti tisa riina riiti ya riiti boboy saga sa riina kiyapo ta.

<sup>7</sup> Kwo iipa God riina kwoti inyakak woshepii takiita. Ma por rii God riina woshepiikasakech. Ma por rii eeta aboboyen chichaney, riipa way eeta aboboyeban eena yakiita. <sup>8</sup> Ma yechi inyaka eechara tawa: ma por riipa riita mashi hiki tar boboyen chinyey, riipa ha tawa boboy sagan riipa eena yakiita. Riipa Spiritek ottichichawa boboyen chinyey, riipa sokwa eechara eechara takiita. <sup>9</sup> Eena nota kepi otii tawa nobon opoche nomoyatanakech. Nota maba nomoyanan siiney, komas nota hadabas boboy saga kepin yakiita. <sup>10</sup> Wowak, nota anadii man kiyatay tana nedii yanak, nota napa otii. Eyey ma yenya napa otii. Kristen ma taney, yenya ii napa hehar kiyatay ta.

*Kraist Riiti Men Pol Riita Eena Kwoya Hiki Tar*

<sup>11</sup> Kwota na he: diita keyi tawa boboyen ada eeji tapak kwona harapa keyichirin! <sup>12</sup> Ma kaw ye kwoti maba sabin dagaiken eena harapa bato. Kapo boyewak yecha eechara otiito? Yecha harapa hin anadii ma yechi misomak habaken eena otiito. Yecha Kraist riiti me majin sawonan akiito: akar ma yecha yenya kikir poyenakech eena eechara otiito. <sup>13</sup> Maba sabin daga tawa ma ye lo majin sumowukasakech. Kwoti sabin dagaiken,

yechi hi iika harapa siiken eena dagiiken gegiyato. <sup>14</sup> Wowak, Jisas Kraist riin mek ji harek, worek, ada diita boboyen kwoya hikichi yesokwa taken gegiyato. Jisas Kraist riina jir me nobok ada har. Harek, ada hecho diita nosap eeta kubuchey boboy siir. Diita nosap ma ye ana hechawey, ye eecha hikitu ada kubuchey boboy siibato.

<sup>15</sup> Sapi dagii tawa boboy sii kubuchey boboy. Sapi dagiinan biish tawa boboy sii eecha eeta kubuchey boboy. Harapa boboy siiken diitata: God riita ottichichawak, ma ye akar mabaga eecha sokwato. <sup>16</sup> Kata ma ye eena way eecha hikichiniga sumowutaweyn, God riita yenya sa rukusii ta. Wowak, ye sa eshar ta. God riiti eyey ma siiken, Isrel ma, yenya sa eshar taba ta.

<sup>17</sup> Ada hamawa majin bako, ma kwo ana maji kawka bakasakech. Ma ye ana piri eeji maba diita sabaka tawey, sii eena mukuchichu ada eeta Jisas Kraist riiti wakasa ma.

<sup>18</sup> Yaka kumwoy, Harapa Jisas Kraist riita rukusii tawa boboy sii sa kwotaka eecha ta.

**GOD RITI MAJI KEPI**  
**The New Testament in the Washkuk Language, also  
known as the Kwoma Language, of Papua New Guinea**  
**Nupela Testamen long tokples Washkuk long Niugini**  
copyright © 1974 Wycliffe Bible Translators, Inc.

Language: Washkuk (Kwoma)

Dialect: Kwoma or Washkuk

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-08

---

PDF generated using Haiola and XeLaTeX on 11 Nov 2022 from source files dated 9 Oct 2020

df8dc48f-feff-515c-a5a2-c9c957dac5bb